



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Kejriwal Delhi CM menden nungi agentsü mepishiba SC-i magizük

Chopra & Kishore na indang indanga Fed Cup Finals asayatsü



VOL. XXI ISSUE NO. 211 (ADOK 211) DIMAPUR SANGTENNÜ (TUESDAY) MONUPII (MAY) 14, 2024 ₹ 5.00

## CBSE Class 10 aser 12 results sangdongogo

**New Delhi, Monupii/May 13 (Agencies):** Central Board of Secondary Education (CBSE) ajanga Class 10 aser 12 atema tatidang agiba results Hombarnü sangdongogo.

Class 10 nung tatidang agütsür kaketshir shilem 93.60-i pass asü, kong tebur dang nungi tetsüri shilem 2.04 agi tajungba pass sütet. Tetsür pass asür shilem 94.75 lir.

Kaketshir lakh 1.32 dak tema 'compartment' category nung liasü, koba taoba küm dang tera agi tajemba alitsü.

Class 12 nunga tetsür temi tajungba pass sütet, kong kaketshir pass asür shilem 87.98 liasü.

Taoba küm pass percentage ya 87.33 liasü.

Kaketshir lakh 1.22 dak tema 'compartment' nung liasü.

Taoba küm dang nungi taküm tera tajemba lir, ta ketdangsürtemi ashir.

Taküm CBSE Class 10

tatidang ya February 15 nungi March 13 tashi agi aser Class 12 tatidang ya February 15 nungi April 2 tashi agia liasü.

Iba tatidang nungya linük 26 nungi kaketshir lakh 39-i agüja liasü. New Delhi kisüing nunga kaketshir lakh 5.80-i CBSE Board exams 2024 nung agüja liasü, koba examination centres 877 nung agi.

CBSE ajanga akhi mapang nungi merit lists sangdonga aruba mesangdongtsü telemetba agiogo, kechiaser kaketshirtem tsüingta "unhealthy competition" lir.

Class 10 aser Class 12 nung Trivandrum region ya tajungtiba liasü, kong Class 10 nung pass asür shilem 99.91 aser Class 12 nung pass asür shilem 99.04 liasü.

Kaketshir temi results ya DigiLocker website digilocker.gov.in aser CBSE indang official website www.cbseresults.nic.in nung repringtetsü.

## Angh-i Sano Vamuzo nem tenüngsang agütsü


**Dimapur, Monupii/May 13 (TYO):** Angh La Ganesan-i sangdong ka ajanga Padma Shri award anguba atema Sano Vamuzo nem tenüngsang agütsüogo.

Iba naroküm ya nai lokti asoshi bendanga agüja inyakba aser tatishitsü aketba teyari agütsüba ajanga lir. Nai iba takok tajung ngutetba ajanga state aser Nagaland nung aliba nüburttem nem kongnang tetushi

bener arutsüogo, ta Angh-i ashi. Iba tetushi agizükba ajanga na tali ajungmesor lokti asoshi maneni inyaksü aser tarutsü nunga takok tajung nguyonga aotsü imlaja atar.

Maneni langa aliba ama iba tetushi tulu anguba atema nü nem tenüngsang agütsü aser tarutsü nung takok tajung nguyonga aotsü imlaja atar, ta Angh La Ganesan-isa lemsatapa liasü.

## Phek district nung ASF pokteta alima mechi tekumdangtsü metetdaksü



African Swine Fever azüoktsü mechi DVO Phek kübok task force ajanga May 9, 2024 nü Phek Village nung ak ki nung mozü khaloktsüba noksa nung angur.

**Dimapur, Monupii/May 13 (TYO):** Tawa Phek district nung African Swine Fever (ASF) pokteta mechi Old Town Khel, Phek Village aser temeket kilometre ka telungzük ya Infected Zone ta sangdonger, ta Additional Deputy Commissioner Phek, Ruopfukuotuo Noudi, NCS ajanga ashi.

kilometre ter telungzük nung aliba Chosaba Village, Phek Basa, Phek Town, Lozaphuhu aser Losami tesemtem ya Surveillance Zone alitsü, ta sangdong ajanga ashi.

Item tesemtem nung ak alepba, ak aser ak chanu aliba aser ayongba, aser ak aser ak shi belenba nokdang, ta ADC Phek ajangasa metetdaksü.

## Lok Sabha Election Phase 4 nung vote agütsür shilem 62.9 liasü

**New Delhi, Monupii/May 13 (Agencies):** 2024 Lok Sabha elections tenzükter phase pezü buba Hombarnü state aser union territories ter kübok Lok Sabha constituency 96 nung Hombarnü agia liasü, kong candidate 1,717 tokteper.

State aser union territories ter nung vote agütsür shilem 62.9 liasü. Hombarnü polling ya Telangana state kübok Lok Sabha menden 17, Andhra Pradesh kübok menden 25 prong, Uttar Pradesh kübok menden 13, Bihar nung menden pongu, Jharkhand nung menden pezü, Madhya Pradesh nung menden ti,

Maharashtra nung menden 11, Odisha nung menden pezü, West Bengal nung menden ti aser Jammu and Kashmir nung menden ka atema agia liasü.

Srinagar Lok Sabha constituency nunga vote agüja liasü, koba August 2019 nung Article 370 agienba sülen Kashmir nung election tulutiba alitsü. Kasa mapang Andhra Pradesh kübok Assembly menden 175 aser Odisha kübok Assembly menden 28 atema vote agüja liasü.

Phase pezü buba atema vote agütsütsü temsüa alir nisung crore 17.70 atema polling ketdangsür lakh 19 dak tema

polling station lakh 1.92-i yoka liasü.

Phase pezü buba nung tokteper rongnung Samajwadi Party tekolakba Akhilesh Yadav, Union minister Giriraj Singh, TMC lenir Mohua Moitra aser AIMIM lenir Asaduddin Owaisi, Congress lenir Adhir Ranjan Chowdhury, taoba mapang cricket asaya alir TMC nungi Yusuf Pathan, Andhra Pradesh Congress tir YS Sharmila nunger ya tejangja candidate tem alitsü.

Lok Sabha elections ya phase tenet lemsar April 19 nü tenzük aser June 1 nung tembangtsü. Vote ya June 4 nü azüingtsü.

## Opposition INDIA bloc-i Pakistan tsübor: PM Modi

**Muzaffarpur, Monupii/May 13 (Agencies):** Hombarnü Ato Kilonser Narendra Modi-i opposition INDIA bloc aija jemi aser par lenirtem ya tasü mait aser Pakistan indang nuclear tashi tsübor ta ashi.

Bihar kübok Muzaffarpur Lok Sabha constituency nung election nübuyim sentong ka nung jembidang PM Modi-i tenüng metetshiaka tawa National Conference lenir Farooq Abdullah-i sangdong ka agütsüba athishia liasü.

"INDIA bloc nung Pakistan aser par nuclear tashi kanga tsüboba lenirtem lir mesüker," ta pai ashi.

Abdullah-i Pakistan ket nung atom bombs lir aser kesen ayoka mali ta ashiba sülen India ato kilonseri iba o ya jembia liasü.

"Pakistan kesen ayoka melira,

onoki par linük nem ayokdaksütsü. Parnok jangotzü mali ta ni meteta lir. Ano parnok kesen-a peria mali ta ni angazükogo," ta pai ashi.

"Saka asenoki opposition kanga kumdanga repringtsüla, kong tasü mait aser tashi lular agi sünga lir, shirnoki Pakistan kiralongrar memerenshir, surgical strikes nung temulung malemer... par Left allies-ia asen nuclear nok-nü raksa indokner," ta PM Modi-i ashi.

Hajipur Lok Sabha constituency nung election nübuyim ka nung jembidanga, yimten yimsüsürtem meita aodang sen ngutetba ya linük nung makamaiter indang lir, ta pai ashi.

"ED ama agency balala inyakyim anema parnok kechiba terok ajak kong ajeper ni nenok

dang shiti. Tesüiba nung Congress-i yimsü asüba mapang ED-i sen lakh 35 dang apu, koba school bag ka nung dang asemstü. Onoki yimsü asü tenzükter agency ajanga sen crore 2,200 ngutetogo, koba abentsü atema truck tila 70 bo nüngdaksü," ta ato kilonseri ashi.

PM Modi-i ashiba agi pa den toktepertemo pei chirnur ajungkettsü asoshi bilemer, saka pa chirnur/senmanger mali.

Nüburttem kü senmangertem lir, ta ashi. Congress aser RJD ama party tem power nung lia tashiyim amshia rakzükkraktemba aser nisung apuba tali kimdaksür aser parnok indang vote bank politics asaya Muslim nunger nem reservations agütsütsü, saka ni takum ali tashi itemji matalokdaksütsü, ta PM Modi-i ashi.

## BJP-i Constitution memelentsü: Home Minister Amit Shah

**New Delhi, Monupii/May 13 (Agencies):** BJP sorkari Constitution memelentsü mesüra reservation magientsü, ta Home Minister Amit Shah-i ashi.

Ato Kilonser Narendra Modi-i election ana tashi majority nung takok nguogo, aser Constitution melentsü pai bilema ali asübo mela-mela inyaker lila, ta Shah-i NDTV den sensaksem dang ashi.

"Modi anaben ato kilonser kumogo. Anaben prong pa dak tashi liasü. Anungji BJP sorkari Constitution melennüa ali asübo, mesüra reservation agiennüa ali asübo, shibai onok soittetla?" ta Amit Shah-i ashi.

"Onoki Article 370, triple talaq

agentsü, Ram temple yanglutsü, surgical strike aotsü, Chandrayaan yoktsü, Covid pandemic mapang nisung crore 130 kumzüktsü, nüburttem nem metzü meshiba tesem crore 60 agütsütsü, cooking gas, ki, tajemtsü tzü, power supply, free ration, aser sen lakh pongu tashi health care agütsütsü atema majority ya amshi," ta pai ashi.

BJP ya maneni yimsüsüba mendeni arura Constitution shisa indoktsü ta Congress lenir Rahul Gandhi-i jembiba sülen Amit Shah-i iba o shia liasü.

Constitution indang Preamble nungi "secularism" ojang ya BJP-i indoktsü akok, ta Congress lenir

kari temulung arendaka jembia arur.

Nüburttem anisatsü mechi Opposition temi tiazü o prokshir, ta Home Minister-i ashi.

"Rahul Gandhi-i linük mashileni anisaner. Linük nung aliba nüburi aji meteta lir. Pa ya mangpumangyimer alitsü," ta Shah-i ashi.

"Asen Constitution ajanga nisung ajak nem maongka balala agütsür. Dalit kin nungi Dr Babasaheb Ambedkar-i iba jenjang ajanzük. Babu Jagjivan Ram-i linük ani. Parliament nung Dalits, Adivasis aser OBCs shilem 50 dak tema lir. Pai (Rahul Gandhi) linük koda aor memetet," ta paisa ashi.

## Chozuba town lenmang yanglur dang mepelar: Advisor Khamo

**Kohima, Monupii/May 13 (TYO):** Phek district kübok Chozuba Town nung lenmang junga meyangluba atema Advisor, CAWD and Taxes, Kudecho Khamo kanga mepelar, koba pa indang constituency kübok lir.

"Chozuba town lenmang blacktopping kanga mejungi yangluba angazükogo. Iba

lenmang yangluba indang noksa aser video tem social media sapang balala nung prokshia nüburttem kanga jashiteper aser department aser contractor aitsür," ta Advisor Khamo-i Executive Engineer, PWD (R&B) Phek dangi Hombarnü shiti ka züluba nung shia liasü.

Honibarnü social media

posts nung anguba sülen tanep Contractor temi ali nung ai meya aliba gas cylinder amshia rongdoktsü merangba ngua kanga süngmanger, ta pai ashi.

Anungji nüburttemi aginüba ama iba inyakyim tekeratiba nung bushisüngdangtsüla aser tapet mera agitsü atema osang tejangja agütsütsüla, ta Advisor Khamo-i ashi.

# Aliba nung Cucumber Festival mungogo



May 10 nü Aliba yimtsüng nung 3buba Cucumber Festival 2024 amungba mapang Director Tourism, Nagaland, Veyielo Doulo-i stall tem lapoktsüba noksa nung angur.

**Dimapur, Monupii/May 13 (TYO):** 3buba Off-Season Cucumber Festival 2024, Mokokchung district kübok Aliba yimtsüng nung May 10 nü mungogo. Iba sentong nung Director, Tourism, Veyielo Doulo alakteta jaoker liasü.

Sentong nung o jembiba mapang Doulo-i, benjung ajanga Naga nunger tali longjemdaksür ta ashiba den iba benjung ya chiyongtsü, sobaliba aser teka mapa balala sayaba ka dang masü saka temaotsü lemsatepba mapang ka lir ta ashi. Paisa, takong mapang züngi tsünütsü atema bendanga agüja inyakba ajanga aluyimertem, Village Council aser organising committee nem tenüngsang agütsüba den iba ya

takok khenyongi balaka ta ashi. Paisa, yimdaklirtem dang iba mapa ya wazüka ayutsü aser tangartem nema tangazükba agütsüba den parnok ajungmesotsü ayongzük. Tourism ajungkettsü aser rongsenketzüng nung terenlok asoshi home-stay services amenoktsü atema pai yimdaklirtem ajungshia liasü.

Maneni Doulo-i züngi sayaba dak alia yimtsüng tebur ajung sayutsü koda tongtibang iba indang lemsatepba den tourism guides aser brochures yanglutsü ajungshia liasü. Pai, züngi indang medicinal value tem lemsatep aser aluyimertem dang iba dak sendakba nung maneni bushisüngdangtsü ajungshi. Tatem nung pai,

yimdaklirtemi kanga meranga inyakba atema parnok nem tenüngsang agüja liasü.

Sentong nung züngi lu ayimertem nem tetushi agütsü, kong aluyimer tambusang naroküm Immanichet aser tetsürtem rongnungi Imchasungla nem agüja liasü. Iba benjung atema züngi 22,000 shi onga ayoktsü atema saya liasü.

Iba sentong ya organizing committee Secretary Temjentola lenisüba nung agi. Aliba Village Council Chairman, Tatongkaba Pongen-i o tatsüka jembiba aser organizing committee convener Lipokmar-i lokti pela agizükba o jembiba liasü. Sentong nungsa organizing committee züngsem Rongsennungla Imchen-i tepela o jembiba liasü.

# ADC Phek-i azü kiburtem nem tetuyuba agütsü

**Dimapur, Monupii/May 13 (TYO):** Additional Deputy Commissioner Phek, Ruopfukuotuo Noudi, NCS-i sangdong ka ajanga taoba ita ishika tsüngda Phek jila nung kibur maliba azütemi nisungtem

dak angoba ken o aika adokdar, aser iba ajanga nüburtem rabies tashidak menatsü ana nung aliba indang metetdaksüo.

Anungji azü kibur ajak dang pei azü nem vaccine agütsütsü aser azü alena ayutsü tetuyuba

agütsüo.

ADC-isa, azü kar danga jila nung sadem sadema senzüa ngura ken o dak sendaka aliba ketdangsurtemi aputsü mesüra khaseta intoktsü, ta metetdaksü.

# NCVBDC state team-i Peren semdang



Sentong nung shilem agitrem lepareprangshiba sentong tembangba sülen tangokba noksa nung angur

**Dimapur, Monupii/May 13 (TYO):** NCVBDC, Peren kübok Surveillance Workers tem inyakyim asadangtsü atema National Centre for Vector Borne Diseases Control (NCVBDC) State team-i May 13 nü Peren District semdangogo. Iba team yagi Jalukie CHC aser Heningkunglwa PHC semdanga asadanga liasü.

Team-i semdangba health unit tem ya, tzüngluruwa maru

tsüngda aser Vector Borne Diseases tem poktetsü ana nung aliba majangshi tsüngda renema atatsü asoshi asadangogo.

Surveillance Workers inyakyim ajak asadanga den taoba küm 4 tsüngda surveillance dak sendakba nung district inyakyim asadanga liasü.

Dr. R. Chubala Aier-i staff tem dang nendaka inyaktsü aser surveillance mapang tesem kadanga sentoka metoktsütsü

atema mepeshia metetdaksü. Laisa, senzüsenpong aliba telok aser lenmang yanglurtem ama lendong agi meneptsü ana nung aliba teloktem kanga junga asadangtsü nüngdakba lemsatep.

Kasa mapang nung District Store nung stock, documentation aser reporting format tem ajak asadanga lepa reprangshiogo.

NCVBDC state team yagi Senior Medical Officer, CHC Jalukie, Heningkunglwa PHC MO I/c, MO aser Lab Techs tem den sensaksema liasü.

Maneni District Vector Borne Diseases Control Office, Jalukie nung lepa reprangshiba senden ka amenba sülen iba sentong ya tembanga liasü.

State team nung Dr. R.Chubala Aier, Additional Director & State Programme Officer (SPO), NCVBDC den PH Consultant, Imsubenla nata densema liasü. District team nung DPO CD, Dr Hedungkiebe den District Consultant, Vimekhrie U Metsieo na den tanga staff temi State team nem teyari agüja liasü.

# Mokokchung Press Club-i asükhulemsatep

**Dimapur, Monupii/May 13 (TYO):** Mokokchung Press Club-i sangdong ka ajanga külem züngsem Akangnungsang Jamir tebu Temjenyanger May 13 nü asüba osang angazüka manga ayimba lemsatepogo. Mangyim jashi tia nung aliba mapang Mokokchung Press Club-i asükhulemsatepba agizükang, ta kasa sangdong ajanga metetdaksü.

Tsürapur ka asüamabaji takoksa kanga tulu lir aser onok tebilemba aser sarasadem na aser ner kinungertem den dena lir. Nübu den mapa intokba aser

tajangshibatem aser na meketa aliba temeimtem agi na anisüngzükdakjang.

Nüngdakba mapang teyari agütsütsü asoshi onok renema lir ta metetdang aser nür kibong den külemi onoki mang ayimer aser sarasadem nung bilemteter. Asür tanüla teti tatem makdak

anisüngzükdakjangma ta sarasademja atar, ta Mokokchung Press Club Tir Limalenden Longkumer aser Secretary Sashimeren nati külem sangdong ka ajanga lemsatep

# Nagaland nung Ideation Hackathon agitsü

**Dimapur, Monupii/May 13 (TYO):** "Digital Design and 3D Printing Center of Excellence in the Electronic Manufacturing Cluster (EMC) project ya Government Agencies (3dpcoe.in) den longjemer North Eastern Council / MDoNER, Government of India tawabangba kübok AMTRON-i benoka inyaker. Iba ya NER kübok stakeholder balala tajangzük atema flagship Industry 4.0 initiative ka lir aser project indang osang tejangja website 3dpcoe.in nung angutsü.

Iba project kübok kaketshirtem atema Ideation Hackathon ka June 18 nü Naga Hospital Authority, Kohima nung akatsü. Iba sentong nung High School/Design School/Engineering/Medical/Dental College kaketshirtem ajaki shilem agitetsü.

Tejangrartemi project website 3dpcoe.in ajanga pei tentüng züngoksemtettsü. Iba sentong ya Host Institution atema dang masü saka Mizoram nungi kaketshirtem atema-a lapoktsüo.

**Iba sentong mapanglem:**

1. State Nagaland
2. Venue Naga Hospital Authority, Kohima
3. Date Ideation Hackathon 18/06/2024
4. Last Date for Submission 11/06/2024
5. Screening of Received Applications by Local Committee 14/06/2024
6. Inform Shortlisted Candidates to prepare for Presenting by email and WhatsApp 16/06/2024

Maneni shortlisted Team tem final hackathon nung tanga state nungi team tem den Tech City, Guwahati nung August ita tokteptsü.

Takoker team pongu alitsü aser takok anguba team ajak nem senpet aser incentives team shia nem sen lakh 50 alang agütsütsü.

Iba sentong dak sendakba nung email amtronmktg@gmail.com mesüra Dr. Mamta Juneja (9878677624) mesüra ShRazza Saikia (9854536924) nunger den tongteprateptetsü.

# Sezo Ringa-i pa indang mezüngbuba music video sayaogo



**Dimapur, Monupii/May 13 (TYO):** Local music industry nung danga kanga renloka oya aliba kentener Sezo Ringa-i pa indang mezüngbuba music video "Revival" sayaogo. Iba ken ya, tatok meshiba, tatok agütsüba aser tanüla asüngsashiba dak sendaka lir. "Revival" ken ya temenen nung aliba toktsür Tsüngrem dangi tanaben meyipba indang ken ka lir.

"Revival" ken indang music video ya Nestvibe Studio nung sempet tajung aketba team kati kanga junga yanglutsüo. Director Macnivil-i, Sezo Ringa indang nükla screen ajanga sayatsüo.

"Ni 'Revival,' ken atema kü mulungjang aser tanüla ajak bendanga agüja inyakogo aser alima den lemsateptetba atema

kanga pelar. Iba ken ya kü taküm kuli ken ka lir, kechiyong iba ajanga ni tanüla nung asüngsangshiba aser ainba indang sayur. 'Revival' ken ajanga tangartem dak kongshitsü aser pei taküm melenshitsü asoshi ajungmesotsü imlar," ta Sezo Ringa-i ashi.

"Revival" ya ken ka dang masü saka jenjang agitsü asoshi ayongzükba aser asenok koda len aier senzüa liaka taochi dangi meyiptsü atema lenmang aliba lepshia metetdaksüba ken ka lir. Ken ajanga osang agütsüba aser kensü ola ajungba ajanga Nagaland aser tanga tesemtem nung iba ken angartem mulung nung kongshitsü. "Revival" ken ya tang Youtube nung iba link nung <https://youtu.be/e7K3hbFmUSY> angutsü.

# Mumbai nung yipru lendong nung nisung asem asü; 59 yiru



May 13, 2024 nikongdang Mumbai nung lendong atalokba tesem anasa nisung adenshia aliba noksa nung angur.

**Mumbai, May 13 (Agencies):** Hombar nikongdang Mumbai nung yipru mopung tesashi ajanga signboard tuluka chirepba lendong nung nisung asem asü aser nisung 59 yiru.

Mumbai kübok Ghatkopar East area nung yipru ajanga merang agi yangluba signboard ji laoa petrol station ka kongshi aser iba lendong nungji nisung

Iba yipru mopungji ajanga Ghatkopar, Bandra Kurla aser Dharavi nung tzunglu sashia arua gari, train aser tayimtsü mesenzüteti liasü.

Ano tanga tesem ka nung banner ka laoa inzü nung kongshiba ajanga Aarey aser Andheri East station na tsungda senzüba metro train-a mesenzüteti liasü.

Regional Meteorological Center-i Thane, Palghar, Raigad, Ratnagiri aser Sindhudurg densema district aika nung 'yellow alert' sangdonga lir.

Centre-i item district nung tzunglu sashia aruba den külemi tsüngi aitsü aser yipru mopung ghonda ka nung kilometer 40 tashi kera aontsü, ta tekümdangtsü metetdaksüogo.

# Kejriwal Delhi CM menden nungi agientsü mepishiba SC-i magizük

**New Delhi, Monupii/May 13 (Agencies):** Delhi Excise policy ken o nung AAP tongti lenir aser Delhi Chief Minister, Arvind Kejriwal apuba sülen kari pa Delhi Chief Minister menden nungi agientsü atema Supreme Court nem temepishiba ken o agüja liasü, ajisüaka Hombarnü Supreme Court-i temepishiba ken oji magizük.

Justices- Sanjiv Khanna aser Dipankar Datta nati akümba bench-i, "Ibaji Delhi LG-i melungra pa dak dang keta lir, ajisüaka onokibo (Supreme Court) iba onük nung tiyongtsüi ia meinyaktsü," ta metetdaksü.

Supreme Court-i, iba onük ya tim dang, ajisüaka Kejriwal apuba nung ajemdaker pa Chief Minister menden nungi agientsü atema legal temeden mali, ta

"Iba ken o angadanga mapang nung onokia kasa tasüngdangbaji parnok dang asüngdanga liasü. Iba onük jembitsüji tim dang, ajisüaka iba nungji legal tsütsülen nungibo temeden mali," ta bench-i temepishiba ken o benoker dang ashi.

Nisung ka tenüng agi, Kant Bhati-i Kejriwal Delhi Chief Minister menden nungi agientsü atema temeshiba ken o ka Delhi high court nung benoka liasü, ajisüaka April 10 nü Delhi high court-i temepishibaji magizükba sülen maneni pai kasa temepishibaji Supreme Court nung benoka liasü.

Enforcement Directorate (ED)-i Delhi excise policy ken o nung Kejriwal apuba sülen social worker, Surjit Singh Yadav-ia Kejriwal Chief

Minister menden nungi agientsü atema temepishiba ken benoka liasü saka March ita tatembanglen Delhi High Court-i iba temepishibaji magizük.

Delhi High Court-i, item ama ken o nungji judicial tiyongtsüi ia inyaktüsüa legal tsütsülen nungi tajemdakdak mali, ta metetdakja liasü.

Acting Chief Justice Manmohan aser Justice Manmeet PS Arora nati, Kejriwal Delhi nung maneni CM inyakba nokdangtsüsa legal tsütsülen nungi tajemdakdak mali, ta metetdakja liasü.

Iba mapang nungji Yadav-i, Kejriwal-i maneni Chief Minister mapa inyakba ajanga legal inyakyim nung tetsükdaksü ajurutsü aser state nung temzüng kübok inyakyim raksatsü, ta metetdakja liasü.

# INDIA teloktep nung aliba party temi Kejriwal guarantees pusemer

**New Delhi, May 13 (Agencies):** AAP tongti lenir aser Delhi Chief Minsiter, Arvind Kejriwal indang tenangzükba 10 sangdongba sülen opposition INDIA teloktep nung densema aliba Shiv Sena, DMK, TMC aser JMM party temia ibaji pusema metetdaksüogo.

Ajisüaka Kejriwal tenangzükbatem dak sendakba nung Congress-i odiodia pusema memetdaksü.

Delhi Congress Tir, Devender Yadav-i, AAP tenangzükbatemji ozü party manifesto den mesükteper-Congress indang Nyay Patra amai lir, ta ashi.

CPM Kerala secretary, MV Govindan-i, opposition teloktepi BJP tamakok ngudaktsütsü atema rangloker inyaker aser common minimum programme atemabo Lok Sabha election osang sangdongba sülen dang jembitsü, ta metetdaksü.

DMK otongdar, TKS Elangovan-i, "Kejriwal-i nangzükbatem teimbaka, talisa electricity aser health naji state tem teinyaktsü shilem lir. Itemji state temi dang inyaktsü akok. BJP sorkar ama masü taruba sorkartemi state tem atema GST temenok tutsüra state temi peipei sasep nung welfare mapatem inyaktetsü," ta ashi.

CPI general secretary, D Raja-i, AAP tenangzükbatemji CPI manifesto amai lir aser manifesto renemtsü atema INDIA teloktep nung aliba party tem den angatettepa inyaktüsü

menüngdak, kechiyong party shia peipei manifesto lir, ta ashi.

Raja-i, "Onoka onok meyong manifesto lir, aser manifesto nung libaliro nungi tenzükter shisaliok aser health tsütsü tenangzükbatem lir. Onoki takok ngua sorkar akümba sülen INDIA teloktep nung züngsem ajaki longjemer common minimum programme renemtsü," ta ashi.

Kejriwal tenangzükbatem pelaa agizüka Shiv Sena (UBT) otongdar, Anand Dubey-i, "Kejriwal-i Delhi aser Punjab na nung tokteper. Anungji item tenangzükbatemji item region nung alirtem atema tapet. Ajisüaka Kejriwal-i pai jembiba ama inyaker, anungji item tenangzükbaji atangji tenangzükbatem lir. Ibayongji BJP-i pa tsübur aser pa jail nung puoker. Onoki AAP pusemer. INDIA teloktep nung ajaki pa pusemer. Delhi state jenjang atema-a onoki pa pusemer," ta metetdaksü.

Trinamool Congress nungi Rajya Sabha MP, Derek O'Brien-i, India nung nüburtem telemtetba jangjaogo; Modi tenangzükbatemji tashimait, ta kuli nguogo, ta ashi.

Jharkhand nung JMM-ia Kejriwal tenangzükbatem pusema Party general secretary, Supriyo Bhattacharya-i, "Kejriwal tenangzükbatem denji onoki kasa tangatetba lir. Ajisüaka tenangzükba ajakji Congress-i parnok indang election manifesto nunga nangzüka lir," ta ashi.

# Chhattisgarh kübok Bijapur nung Maoists 14 apu

**Bijapur, May 13 (Agencies):** Chhattigarh kübok Bijapur district nung Maoists 14 puogo aser parnok rongnung nisung 11 apuba atemabo senpet sen lakh 41 agütsütsü sangdonger liasü, ta Hombarnü police ketdangser kati metetdaksü.

Maoists telungpur 14 nungjagi parnok trokbo tetsürtem liasü.

Parnok rongnung Wing movement 'military company number 2' aser 'Gangaloor area committee' nungia züngsem kar liasü.

Amongnü Mutvendi aser Pidia yimtsüng na arem nung District Reserve Guard (DRG) aser district police senteper mita aodang parnok 14 apu, ta Bijapur police-i metetdaksü.

"Maoists 14 nungjagi parnok 11 apuba atemabo senpet lakh 41 agütsütsü sangdonger liasü. Parnok rongnung military company number 2 nung züngsem Renu Kovasi aser Gangaloor area committee

nung züngsem Mangli Avlam na densema liasü; tena apuba atemabo senpet sen lakh 16 agütsütsü sangdonger liasü," ta police sangdong ajanga metetdaksü.

"Gangaloor area committee nung züngsemtem- Bichchem Uika, Sharmila Kursam aser Lakshmi Tati nunger apuba shia sen lakh pongungu, züngsem pezü apuba atema parnok nisung shia sen lakh anana aser züngsem ana apuba atema sen lakh kaka senpet agütsütsü sangdonger liasü," ta kasa sangdong ajanga metetdaksü.

Parnok apuba sülen asüngdangyaba ajanga parnoki miima aliba tiffin bomb pezü, cooker bomb ana, detonators, cordex wire, gelatin sticks, firecrackers aser Maoists documents kar apu.

May 10 nüa Pidia yim kübok arem nung sepaitemi telungpurtem mita aoba mapang nung Maoists telungpur 12 khaseta liasü.



May 13, 2024 nü Patna nung RJD tongti Lalu Prasad Yadav, pa kinüngtsü Rabri Devi aser Patliputra constituency nungi party candidate, Misa Bharti nungeri nomination file asüba sülen tangokba noksa nung angur.



## TIR YIMYIM YIMOBILEM (EDITORIAL)

DIMAPUR SANGTENNÜ, MAY (MONUPII) 14, 2024

### Soruchioker shimoker !

**N**agaland nung Neiphiu Rio-i aniba NPF aser iba sülen NDPP government-i taoba küm 20 dak tali yimsü süa aruba mapang takok ngua inyakba mapatema aika lir saka ano tamakokang teimba asütsüa akok. Aji oda, tamakok tsütsü reprangra takok ajak nembanga tamakok anguba mapa kaji Naga yimten tebilemstü kokteta Naga yimten ken o telemtetba kati arutsü melen, Naga yimten nüchiso bushir telokang küm shia telok tasen kaka renlokdahtsü amai taoba küm 20 dak tali yimsüsüa arudang Naga yimten nüchiso bushir teloka metsü dak tali amai kümogo. Aji oda, anepdangbo anü pua anogo tenzük nung, kopi melii anogo piyong tzünglu arua mepet sübang ama, alima aso 21 buba tenzük dang, Nagaland nung regional party tenüng tasen kati government bener aotsü tenzük aser iba government nung leniri Naga nung nem teimla tasen ka agütsübaji Naga yimten tebilemstü ken o ya yaktasa tatembang küma latettsü ayimoktsüba yimyim liasü. Ajisüaka, election agi shia Naga yimten tebilemstü ken o tatembang küma latettsü asoshi election agir amai ken o tapu aika jembia election-sa election agia aruogo. Iba jagi India election süaka aiben Naga yimten nüchiso bushirtemi dena shilem agia takok ngudaktsüba tatalokba aika asenoki ajanga aruogo. Ajisüaka, India election nung shilem agiba agi Naga yimten ken o tepongbaba akümba dak alaka Naga yimten nüchiso bushirtema telokang tali lemsaogo aser India government tsüngdanga asenok sentsü tilaba küma aoba asenoki meteter. Aji oda, asenoki election nung takok angutsü atema Naga yimten ken o süokli aser election temerbo telong tema nung alir ajak tebilemstü aser taginübaji sen-ang kümli ta asüba agi, tangbo asenok ajak Naga yimten nüchiso bushir masü sen bushirtemang kümogo. Atangji, alima nung takar kümübaji nisunger yimya, ajisüaka asenoki Naga yimten yoka aser Naga yimten nüchiso tenüng nung rongsen bendena takar akümbaji tangar ki ka jenjanga masütsü, saka iba jagi Naga nung tenangzükba lima atongtsü lia ano tanaben yimjen bushia ao ama, tanübo Naga yimten ken o ya shiba den kong koda jembitsüar mejangjateti ka kümogo. Ashiko, iba tensa tia yagi shisaboludaktsüba agi, ano khen asentenshia Naga yimten tebilemstü ya koktettsü lenmang bushitsü atema "Political Affairs Committee" ka shimtsü lemtet südi. Atangji, tebang agibo Naga yimten ken o India den shitak jembia odar ta yimjak nung dena jembir saka küm 20 nung telokang 20 küma aoer ta atalokra, ajibo ken o shitak jembia aoba mapa aser mapang ka masütsü. Aji oda, tenüng agibo Naga nung ajak longjemer Naga yimten tebilemstü tatem küma latettsü atema Nagaland tatar senden nung opposition mali, ajak government nung dena lir, ajisüaka Naga nung longjemtsü jembia jembia Nagaland anüdoklen alirtem o anülulen alirtem na, joko, state balala nung alir amai küm DAGI. Iba ama mapang ka nung Nagaland nung tenteta aliba yimten telok shia nungi Nagaland tatar senden nung temendak purtem den yimten lenirtem shimteta luden tilala aika agi Luden tuluka küma Political Affairs Committee shimbaji aon junga mesotetba agi kin kidong shia nungi soruchioker tejen kar shimok amai dang asütsü. Atangji, aon junga asotsü atema soruchioker shimokbaji junger. Ajisüaka, shin o nung ashi ama, " soruchioker aika süra aon menentsü." Ibaji dang masü saka soruchioker shimokyonga, soruchiokertemji tejenpurem dang süra aonjibo kasa dang asütsü. Naga yimten asoshi Congress o BJP na kasa dang, tenapronglai Naga nung nem yimten nüchiso agütsütsü memulunger aser Naga nung ajak yimten ka kubok longjema alitsüba temeten aser tejangrabaa magizüker. Iba ken o ji temulung nung yur tang Nagaland government-i shimtetba Political Affairs Committee yabo teyariteper 'Facilitators' ama ka dang masü saka Naga yimten jenjang ka latettsü atema shisatsü tasen agüja aniba lenirtem aser tayongertem asütsü tim. Anosa tang amai 'facilitate' dang asünungbo Nagaland agi roker küma lemsar balala soruchioktsüsa akümtsü.

## OLEMSABANG

### TEJAKLEN MESÜRA TESÜLEN TEJAK MESÜRA TETONGSÜK


~ Süpongñungsang Longkümer , Darogapathar Dimapur

Tanü alima yimya palaka melenshiba aser tatalokba balala ajuruyonga arudang nüpurtem yaria Tsüngrem metetter aser tangatetter aikati WhatsApp, you tube, Yt music tem nungi osang palala sangdongba rongnung Taküm Tsüngrem osang tajung agi amangbapurtem tamang nungi atsüngzuka modaktsütsü asoshi ken aser osangtajung agi ajongmesudaktsüba asentenshidaktsüba tajungtiba rongnung ya lir Tsüngrem tenüng asanger. Item nüpurtem Tsüngremi moajang tasa sarasatemer. Saka shidakba Tsüngrem metetba tsütsü nungi asü, mesüra alima yimyayimbong ngua Tsüngrem bushiba tsütsü nungi sangdonger item ajak metemtanga sangdongtsü nungdaker. Kechaser tang temulung meyipber ama ano densa ka ajuru nung meyipba oadoker alir ta asüba tamangertem aika lir. Saka ni angatetba agi atangji temulung meyipba burtemi alima densa apir tamanger rishikangshiba burtem asoshi sarasatemtsür aser tasüita Tsüngremer osang tajung sangdongtsü nungdaka kümaogo. Tang mapang ya arogo nung tenzüktsü mataaka bei kidang nungi saka apusua oa Tsüngremi kümzükba kuli agi nüpurtem den jembitsü koka lir ta angatetter.

Covid 19 wara mapang tenlaki shibanga yur you tube nungi Tsüngrem külemba tu tajung tekülemi moaka Tsüngrem oupo angashidaktsüogo. saka tamang nung tasü mait tamang maliba Tsüngremji tekümszüker Tsüngrem ta menangzüketba nipo angatetter. Karipo junga akizüker alitsü iyongjiang kibong asoshi mapang tajung asüa ta angazüogo. Saka yimtsüngtem nungpo tenlaki meshibange odang külema, aji tang masü asenok dak alaka pi kin Town nung alirtema aika tamang agi tenlaki lapoka tekülem shidak akitetba ajuruogo. Arogo shia amongnü bendanga agütsüba tekülem tamang ajungshiba oula (Ola) arogo ajak nung jembia arur anungji you tube osang medene arogotem asoshi aji tepiri südisü ta angatetter. Kechaser tajung dokteper ama ka tang süra ajibo amajok. Saka arogo kar nung tebilemba palaka lira ajibo bei mulung saka youtube atemer tenla kidangi marunür, Azünga alir laishirtemipo mashi mapang nung pai/ lai mulungra you tube nungi Tsüngrem mapa inyakbaji mapa tajung saka arogotemi parnok mapa merakzuke satema doktsü tajungba südisü ta angatetter. Yimtsüng nung aser Towntem nung theologian aika samaba tanülatem kümzüktsü asoshi mulungtetba burtem arogo ka nungposa inyaktsü ta masü akok tashi Tsüngrem mapa inyaktsü nokdakba burtemi you tube nungi Tsüngrem ousang sangdongba ya kanga tajung anungji nisung shiai bei alidak tashi maitbabur mesüra khrista majuruba burtem khrista tangi anir aru nung doklang tenzükburtem den temoatsü kasa angutsü ta angatetter. Ao ou(o) ya yimtsüng ka nungi adokba masü Aor ou anungji ketdangsürtemi temulung agüja medokmeberi ajak yanglushia metongshi mesüra university tashi züngdaktsütsü majungtsü südi ta angatetter. Lanurtem nem kanga kümtanga angattetdaktsü oujang aser oulong aika lir atakatem aketba, temoatsü aliba jembiyim aika lir. Tateshitsü agi nisung ka tenüng nung temoatsü anguba dang NUNGO ta aikati jembia mesüra zülua angur, ibai tetezü kechi ? Nung-o tetezü mali tetezü aliba ji NÜNGNGU tamamatsü anguba temoatsü. Kari NÜNGMO ta amshir tetezü tetsü tepou mesüra tsürapor tenüng nung tamamatsü temoatsü senmang mesük Bentet bentetta amshitsüla. Arogo atema, asoshi, Yisu atema, asoshi, Tsüngrem atema, asoshi ta temoatsü keta jembitsü tajung endoker arogo mechi, lokdi ,arog mechi Yisu mechi Tsüngrem mechi. Yisu, aser Tsüngrem dak pongmen maket. Mechi oujang ya atakatempa tsütsü tamajung. Anungji ang kü mechi nenok kanga timtemdaktsügo tetezü kü tai yong ta jembir .Lanurtem nem Aor ou tai mangazükdaktsütsü kümtangtsüla.Temishi sabang nungi atakatem ou tamajung tsütsü nungi jembitsü akok, Saka Tetezü metettsü kanga nungdak. Mongtang nung, arogo nung, Theologicale collage tenüng menüktsü mechi tanü Aori MECHI ya kanga sapua jembir südi ta bilemer yapo hau ta makizük tashi tangatetri metongshitsütsü nungdaker. Tejaklen, tesülen, tejak, tetongsük mejangjara takushiba tsüngtsüng tang asütsü. Laishiba raa metettaka Laishiba nung Lai tatembangba Jongkai adok ibai kanga tongtipang aser ratettsü atema tapu shia tetsünglen tanga Lai tapu toyua alinungji ajakji pushia züngra jangratemtsüka aser tesüngmangtsüka, aser angatetter. Anungji Laishirtemi Santem nem ratetta magütsütetra Laishirtem kechi asütsü? tongmelang agi lemsateper. Tsüngremi moajang.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## 'Hope for Lahaina' sentong nung nisung aikati Khrista agizük



"Hope for Lahaina" sentong nung Harvest church nungi sayutsünger, Greg Laurie-i jembidang tangokba noksa nung angur.

**May 13, 2024:** Taoba hopta Hawaii nung Harvest Christian Fellowship-i ayongzükba "Hope for Lahaina" sentong nung nisung aikati Khrista agizük.

California nung amenoka aliba Harvest church network nungi sayutsünger pastor, Greg Laurie-i Lahaina nung aliba Ritz Carlton Kapalua Hotel nung sentong ana nungji Tsüngrem O jembia liasü.

Yaküm August ita nung Lahaina jila nung merok-mi lendong nung nisung 100 dak tema asüba den külemi nisung 6,000 dak tema prokshia liasü.

Osangbener den jembidang pastor Laurie-i, "Nisungtemi teimla osang atema tzürar. Kodang nü ket nungi ajak bener oadokdir, kodang nai meimba nisung kar süadokdir mesüra mi agi ner ki rongdokdir, mesüra nü meyong ajak samatsüdir ibaji ajanga nisungtem kongshir," ta ashi.

National Oceanic & Atmospheric Administration indang National Centers for

Environmental Information-i, tawa merok-mi lendong ya US nung tesüiba küm 100 tsüngda tang tamajungtiba liasü, ta metetdaksü.

Pacific Disaster Center & Federal Emergency Management Agency-i ashiba agi, merok-mi ajanga kiojen 2,000 dak tema rongdokogo aser dollar sen billion 5.5 takoksa nguogo.

"Hope for Lahaina" sentong ana lemsar agi aser sentong ana nungji nisung 3,000 dak tema aden. Amongnü aonung sentong nung Leeland-i tekülem aser tetushi ani aser American Idol nung tokteper, Danny Gokey-i ken tena liasü.

Laurie-i, nisung 100-i Khrista nem taküm bendang agütsüogo, ta metetdaksü.

Lokti den jembidang Laurie-i, "Asenok teimla samadang asenoki kechi inyaker? Asenoki Tsüngrem dak rangloker. Tsüngremi teimla keta aliba kaket ka asenok nem agütsüogo, aser iba kaket dangji Laishiba ta ajar. Iba

kaket nungji nai nüngdakba teimla angutsü," ta ashi.

Paisa, "Teimla nungja ka lir, aser ibaji Yisu lir," ta ashi.

Osangbener den jembidang Laurie-i, "Arogoi nüburtem nüngdak reprangteta tekeraba nung inyaker, kechiyong yaküm merok-mi sülen nüburtemi aika nüngdaka liasü," ta ashi.

"Nisung ka ozü Arogoi aru. Par ki rongdok. Pa ket nung chiyungtsü mali, süoshi mali. Pa ket nung kecha maliasü, anungji onoki Maui Relief Fund tenzük aser nüburtemi kanga melungsoa tenla agütsü," ta pai metetdaksü.

"Onoki chiyungtsü, süoshi, tzü aser nisung kar nembo sena agütsütetogo. Iba dak alia khen jenoktsü atema ki agütsüba den tanga teyari balala agütsü," ta paisa metetdaksü.

Hope for Lahaina sentong nung Khrista nem taküm bendanga agütsürtem nem "New Believers Bible," kaka lema agütsü; iba Laishibaji tamanger tasenpurtem atema adokba Tasen Lai lir.

## Brazil nung Arogotemi tzümetsüng agi kongshirtem jenokdaksür

**May 13, 2024:** Brazil nung tzümetsüng lendong tulu atalokba sülen linük tesem balala nung Arogotemi Tenla kidang timtemertem jenokdaksa yaridar.

Tzümetsüng lendong ajanga nisung 136 süogo aser nisung 537,700 dak tema tesem balala nung prokshio.

Local Arogotemi yariba dak alia Samaritans' Purse aser Operation Blessing densema Khristan melungtet telok balalaia teyari agütsüdar.

Operation Blessing-i joka asem amenoker anogo shia nisung 6,000 shi mesüdar. Virginia Beach, Honduras, Costa Rica, Puerto Rico, El Salvador aser Chile nungi Operation Blessing nung züngsemtem Brazil nung tzümetsüng agi tamajungtiba kongshiba tesem- Novo

Hamburgo tonga aoba sülen timtemertem nem teyari balala agütsüdar.

Operation Blessing indang International Disaster Relief team-i alima tesem balala nung tzümetsüng lendong atalokba tesemtem nung teyari agüja arur.

Depolyment Manager, Jorge Pratts-i, "Onoki rong nung mener tzümetsüng agi kongshiba asadanga liasü aser jila ka nungbo tzü agi ajak metsüngbanger ki aiben amentepa asüba ki kolak dang angur. Tzü kanga menenadokogo aser Dengue den Zika tashidak proker. Ano maneni tzünglu arutsü asadangteta lir," ta metetdaksü.

Samaritan's Purse-ia parnok indang 757 cargo tayimtsü ajanga North Carolina nungi Brazil tashi chiyungtsü

den nüngdakba oset aika bener otsüogo. Item rongnung tzü filtration systems, hygiene kits, blankets, solar lights aser community water filtration systems densema lir.

Samaritan's Purse Tir aser sayutsünger, Franklin Graham-i, "Iba tzümetsüng lendong agi kongshirtem atema sarasademjang, kechiyong ano tzünglu sashia arutsü," ta metetdaksü.

April 27 nungi tenzuka tzünglu maneni aruba ajanga jila aika tzü agi metsüngbangogo aser tang nisung million 1.4 bo electricity mali timtemdar.

Pope Francis-ia tzümetsüng agi kongshirtem yaritsü atema Euro sen 100,000 lemküktsüogo. Senotsüji National Episcopal Conference of Brazil South 3 Region-i ketdangsia amshitsü.

## ANO GO ABEN TSÜNGREM DEN

### Tsüngremer Mapang Nung Amangang - T.ken 94:1-10

"Kibuba, tamajungertemi kopika... takok angutsü?" (t.3). Ajaki iba tasüngdangbaji asüngdang. Iba temulung nung shia bilemba o Laishiba nung aiben shia lir. Temeshi nisungtemi ayimtener, "O Kibuba, kobika?" Saul chubai Dawid taküm agitsü arishidang Dawidi iba tasüngdangba aiben asüngdanga liasü, "O Kibuba, Nai nangzükba chuba mendeni ni matudang kobika ni yamai alitsü?"

Tsüngrem Pa sentong asenok asoshi kar ta ken züluri ashi. Pai asenok sarasadem angashir aser asen nüngdak meteta lir. Kechi ataloker Pai shidakji metet. Tamajungeri parnok kübok ajak lir ta bilemer. "Aser parnoki ashir, Kibubai tangua mangutsü, mesüra Yakob Tsüngremi tangateta mangatetter" (t.7). "Onoki kechi inyaker angutsü makok; Tsüngremi kecha meinyaktettsü." Tamajunger tiyazü tamang ibaji lir. Saka ken züluri ibaji apuoktsüba kuli agi langzü. "Shibai tenarong neploktsü, Pai mangashili ma? Shibai tenük yanglu, Pai menguli ma? Shibai kintem o bendanger, oda shibai nisung dang shisatsü sayur, Pai marütsüli ma?" (t.9,10). Tsüngremji asenok dang nungi temeli tatsükba asü? Alima nung kechi ataloker Pai angur. Pai pa nüburtemi ayimtenba angashir aser azüoker.

Mapa ajak asen teka nung ayutsü asenoki bilemer. Mosai iba mapaji inyaker aser pa lisem limai odaktsü aser idakji pa küm 40 Tsüngrem nungi angazüka ali. Na "kopika, Kibuba" ta ayimtentsü tia ka nung lir. Tsüngrem dak ranglokang aser tiaji ne dang nungi Pai tajungba metetta lir ta bilemtetang- tali metetta lir. Idangji pa dang ataa liang. Mita liang aser sarasademang. Pai pa tenangzükbatem ayutsü ta nai jangjatsü.

Tsüngrem inyakyim aser mapang angazüktsüji taküm tepiyong mapa lir. Kodang nai Tsüngremi inyaksü asoshi aremzüka atatsü nüngdakdir, Pa dak mezüngbuba ranglokang aser Laishiba nung Pa tenangzükbatem nung azüitang. Idangji Pai anebaluba nung anisüngzükang. Pai ne tia metet aser Pai pa otem ayur. Pai mapang tetemsü nung inyaksü.

## UK nung China nunger Arogotem kanga renlokdar

**May 13, 2024:** United Kingdom nung China nunger sociologist, Yinxuan Huang-i, Arogo aika kanga kera tesüiba küm asem tsüngda renlokdar, ta study tasen ka Hong Kong/China nunger ajanga bushitetogo, ta Khristan nütsüng renlokba International Christian Concern shilem 29 agi teimba liasü aser (ICC)-i metetdaksü. kasa mapang nungji Hong Kong/China nunger Arogo tasen mesüra Khristan organization tasen 32 tenteta liasü, ta metetdaksü.

2021 küm nungi 2023 küm tashi nung Hong Kong nungi kibong aika UK-i arua jenoka London School of Theology-i study ka agia liasü aser iba study nungji British & Foreign Bible Society-ia yaritep.

Iba study ajanga, 2021 küm nungi 2023 küm tashi nung Hong Kong nungi nisung 200,000 dak tema UK-i aruogo ta bushitet, aser ibaji talisa 2019 küm nungi democracy pusema longkak aitba aser Chinese Communist Party-i Hong Kong nung lokti aser Arogotem madak ambangyima inyakra ajanga liasü, ta bushitet.

"Tang mapang ya Britian nung China Arogo atema jangratemtsü mapang ka lir. Arogo kanga indar aser China nungertem Arogoi anidentsü atema iba ya mission maongka tajung lir. English oshi agi tekülem sentong agiba Arogotemia Hong Kong nungi arurtem tekülem sentong nung adentsü atema jaoktsü asoshi maongka angur. Arogo aintsü atema maongka aliba dang masü saka kati ka dang nungi angazükteptsü atema maongka lir," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Süngrangtsü

(n) süng arangba oset (saw)

\* Süngrangtsü techira agi süng melamelaa rangdang.

Süngrülongrü

(n) süng nükdongnükra aser süngri aliba, nisung temulung tarok (deformed and twisted wood / covert)

\* Süngrülongr ü agi ki meyanglur.

OLONG PAITEP # 6786

Grid for crossword puzzle #6786 with numbered squares.

TIPLÉN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang tonglonsü alu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünusenongtsü adokdak - (3)

OLONG PAITEP # 6785 TELANGZÜBA

TIPLÉN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nungjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.


NAI-A YA METETTER MA

IPL 2024 ASAYAMUNG NUNG ASAYARTEMI RUNS TIMTIBA YANGLUTETTER KAR YAMAI :

Table with 4 columns: Player, Mat, Inns, Runs. Lists players like V Kohli, RD Gaikwad, TM Head, etc.

Assam: Taoba Tezpur MP Iswar Prasanna Hazarika süogo

North Lakhimpur, Monupii/ May 13 (Agencies): Tongtibang bureaucrat, yimden yimsüsür, management consultant, lawyer Iswar Prasanna Hazarika, Hombar anepdang New Delhi nung 9:30 nung süogo. Pa mapang talangka shiraga liyar arishi küm 87buba nung süogo.



Iswar Prasanna Hazarika

Hazarika ya 1937 küm North Lakhimpur nung aso aser pa 1951 küm Assam state melem dang tsünga Matric tatidang nung mezüngbuba jenjang nung takok anguba sülen lia arudang tongtibang nisung ka aküm.

Pa Benaras Hindu University aser Delhi School of Economics nung azüng aser iba sülen London nung nungtugu Lincoln's Inn nungi Law nung Bar ka ngua liasü.

Hazarika mapa inyaka aliba mapang wadang balala nung tenzüka aruogo.

Pa 1981 nungi 89 küm tashi

nung Standing Conference on Public Enterprises (SCOPE) Executive Vice-Chairman aser SCOPE indang Executive Board züngsem liasü. Ano pa Director, Boards of NTPC, STC and MMTC of India, 1981-88; Board of Governors, Indian Institute of Foreign Trade, New Delhi, 1987-94; President, Bharat Diamond House Bourse, Bombay, 1988-89; M.M.T.C. Chairman aser Managing Director, 1988-90; State Planning Board, Assam

züngsem 1994-96 aser 1995-95 küm Assam State Electricity Board mendenbuba liasü.

Maneni Hazarika ya I.L.O. Conference, Geneva, 1982, World Diamond Congress, Antwerp, 1984, Association of State Trading Organization, Belgrade, 1986, International Fertilizer Conference, Budapest, 1989 aser New York 1990 nung India delegate rongnung züngsem ka liasü aser DPR Korea, Brazil, Romania, Thailand, USSR, Zimbabwe dangi Trade Delegations nung densema liasü.

Ano Hazarika ya Congress party kübok Tezpur HPC nungi 1996 nungi 1998 Parliament züngsem ka liasü.

Pa tasü mang Hombar nü Lodi Road Crematorium, New Delhi nung rongogo.

Hazarika-i, kinungtsü, jabaso ana aser jala ka toktsür iba lima nungi pilaogo.

Pa asüba osang angazüka linük ajunga nung mangyimdar.

Meghalaya: KHADC delimitation committee tetsükdaksü ajurur

Shillong, Monupii/May 13 (Agencies): Meghalaya nung constituency 29 yanglushitsü atema nonglokja aliba KHADC Delimitation Committee pur, electoral rolls shitak mebenokba aser yimtsüngtem nungi züngsem tasen züngoksemtsü atema temepeshiba tali akümba ajanga tetsükdaksü ajangshidar.

Osang ajanga ashiba agi, committee-i, Ri-Bhoi, South West Khasi Hills, Eastern West Khasi Hills districts, aser Sohra

civil subdivision nungi tang tashi electoral rolls mongui lir.

Committee mendenbuba Stralwell Kharsyiemlieh-i ashiba agi, constituency yanglushitsü atema electorate tasazük jangjatsü asoshi item roll tem ya nungdaker.

Iba dak alia, yimtsüngtem aikati lokti nem osang agütsüba mangazük aser tang committee den tongtepratepdar. Parnoki iba inyakyim indang mejangja liasü, ta ashir.

Kharsyiemlieh-isa, parnok tebilemba-a angadangsü

nungdaker, ta ashi.

Maneni osang ajanga ashiba agi, temepeshiba tasen agütsüba ya agizüktsü magizüktsü committee-i mejangja aser KHADC Executive Committee dang ken o ashishitsü.

March 13, 2025 tashi nung iba mapa tembanga inyaksü atema mapang atsülangtsüogo, ajüsüka temalen shisema aliba tetsükdaksütem ajanga maparen tembanga inyaktetsü minyaktetsü mejangjai kümogo, ta Kharsyiemlieh-i ashi.

Rakzükrakdemba atema Manipur nung KYKL züngsem ka apu

Guwahati, Monupii/May 13 (Agencies): Kanglei Yaol Kanna Lup (KYKL) züngsem asütsü ta temulung melemi bilemba nisung ka puogo. Pa ya Manipur nung southern Bishnupur district kübok tesem balala nung rakzükdemba ken o balala nung densema liasü.

Bishnupur district kübok Ningthoukhong bazaar anasa tenokdangba agütsür aliba

KYKL telok nungi züngsem kati rakzükrakdemba indang osang tejangja angazükba sülen, Assam Rifles aser Manipur Police na longjemer Deobarnü meita aoba sentong ka ayongzüka liasü.

Meita aoba sülen KYKL züngsem Asem Netaji Singh puogo, shiba dang Neta ta ajar. Pa ya arishi küm 40 tain lir.

Pa ket nungi police temi Computers set ka aser mobile

phone densema oset balala ngutetogo.

Pa ya taoba ita ishika, nüburtem, sorkar tenzükertem aser shishilembar dang nungi rakzükrakdemba ken o balala nung densema liasü, ta osang ajanga metetdaksü.

Pua alisang aser pa ket nungi ngutetba osettem ajak police nem bendanga agütsüogo, ta kasa osang ajanga metetdaksü.



Imphal: Council of Higher Secondary Education Manipur (COHSEM)-i ayongzüka agiba Class 12 Board tatidang nung teburtem dang nungi tetsürtemi tajungba takok ngutetogo. Taküm pass percentage 97.63 per cent liasü. Kasa mapang nung sorkar school tem dang nungi nija school temi takok tajungba nguteta liasü.

# Israel sepaitem Jabalia-i ano ao, Palestine nunger ajener

**Gaza City, Monupii/May 13 (Agencies):** Gaza north tsütsü Jabalia nung kanga sashia raraba osang lir, kong Hamas telok tanaben tentetshir ta shia Israel mitkartem oa lir.

Iba tesem nungi jena aortemi ashiba agi, Jabalia indang refugee camp tsütsü tanks tem aoba nguogo, kong Honibarnü bomb kanga sashia poklokja liasü.

Hamas indang military wing-ia camp anüdoklen sepaitem den rarar ta shiogo.

Kasa mapang Gaza south tsütsü Rafah nungi nisung 360,000 jenogo ta UN-i ashir, kong hopta ka tejakdang nungi Israel mitkari amaker.

Palestine nunger million ka dak tema jenoka aliba Rafah nungi nüburttem ainshitsü Israel mitkari toyuyuba agüja liasü.

Rafah temeket nung raraba ajanga tesem balala nung jenoka alirtem dang tzükumlen al-Mawasi aser Khan Younis yimti leni aotsü shiogo, saka UN-i parnok yaritsü atema nüngdakba services tem mali ta

ashir. Hombarnep Jabalia nungi tetsüing agi jena aoba tetsürtemi ashiba agi, parnok alidaki tanks tem aruba ngur parnok ainshitsüsa akum.

"Tank ya school classroom tesülen liasü. Onok tenük agi mangu tashi onoki yutsür monü liasü," ta Umm Jumma-i osangbener dang ashi.

Ano tetsür kati, onok ya tesem balala nung jenshia senzür aser tang onok Jabalia nungi ainshiogo aser koloni aotsüar memetet, ta ashi.

Hamas den sendaktepa aliba Safa news agency ajanga ashiba agi, Jabalia camp indang market anüdoklen Palestine nunger telungpur aser Israel indang tanks tem rarar, aser iba anasa UN-i lapokba school tem nung civilian tem jenoka lir.

Hombarnü Jabalia camp nung Israel-i nisung aliba ki amakdang nisung ana tepset aser Jabalia jila nunga nisung aika tepset, ta official Palestinian news agency Wafa-i ashir.

Jabalia nungi civilian tasü mang 20 ngutetogo aser item ya Beit Lahia nung aliba Kamal Adwan hospital nung lir ta ambulance amshirtemi ashi.


Ajisüaka Israel Defense Forces (IDF) nungi telangzüba kecha agüja mali.

Hamas züngsemtem tanaben adenshitsu merangba indang itdangiterba osang nung ajemdaker Honibar nikongdang nungi Jabalia nung operation tenzükogo, ta IDF ajanga Deobarnü shia liasü.

Ano kiralongrar samatsüsü aser kiralongrar indang ki o jen raksatsüsü mechi Gaza City anüdoklen Zeitoun tesem nunga operation tenzükoga lir, ta IDF-i Deobarnü ashi.

October 7 nü Hamas teloki Israel south tsütsü arütsü alema oa amakdang nisung 1,200 shi tepseter nisung 252 pua bener aoba sülen Israel-i Gaza nung Hamas samatsüsü nükjidong nung rara arur. Aser tang tashinung Gaza nung nisung 35,000 dak tema tepsetogo ta ashir.

## Mulungnen O




ASO : 01 March 1925

ASÜ : 07 May 2024

Onoki teti meima aser akümtsüba aliba tsürabur **Alimeren Jamir**, Ungma, Kibubai moatsüba akümlir wadang tembanger alima nungi May 07 2024 anogo nü pila-a ogo. Iba mangyimba tia nung alidang ana aser talang nungi shirnokisa nübu, rongsen aser sarasadem agi nungita yaritepogo, nenok ajak dang tepela lemsatepber aser nenok temeim mapa onoki kodanga mamadoktsü. Asen takar Tsüngremi nenok ajak maneni moajang ta ozü sarasadem.

- Temeim Chirurtem, Anükapang aser Semchirsemnurtem.

# Pakistan PM Shehbaz-i teti Nawaz nem PML-N menden azüngtsü



**Islamabad, Monupii/May 13 (Agencies):** Pakistan Ato Kilonser Shehbaz Sharif-i Hombarnü PML-N tir menden aitsüogo aser pa teti Nawaz Sharif party tir inyaksü mapang tongogo ta ashi.

2018 kum Pakistan indang chief justice inyaka alisang Mian Saqib Nisar tekolakba sür Supreme Court bench kati Constitution indang Articles 62 aser 63 kübok disqualify sür alir political party tanishir meinyaktetsü ta obendang agütsüba sülen Nawaz ya par party tir menden nungi anenja liasü.

Nawaz ya PML-N tir inyaksü asoshi lenmang lapokja 2017 kum parliament ajanga mangatetep aliba Elections Act 2017 agienba anema petitions 17 benokba nung telangzüba agüja tematiba court-i iba obendang ya agüja liasü.

Panama Papers obendang nung Nawaz ya public office anitsü metemsü ta shia liasü, kong züngsem pongu SC bench kati taoba ato kilonser ya ozüing yanglur ka ama ochishia aser mapa shidak inyaka maru ta obendang agüja liasü, koba Constitution indang Article 62(1)(f) nung shia lir.

Mepetmesü balala ajurua aliba mapang party tir inyaksü

Nawaz-i pa nem nungloktsü aser iba mapa pai bendanga agütsür nendaka inyakogo, ta PM Shehbaz-i PML-N indang secretary general dang shiti ka zülua liasü.

"Ajisüaka iba mapa ya asen lenir kü nem nungloktsüba tamang katetba map aka ama ni teti züngshia aru," ta pai ashi. Asen linük ochishia tajungtiba nung tenzüksü asen lenir dak tangatetba tajung ajiteta temulung nung tepela ka arur, ta pai ashi.

November 29 nü Islamabad High Court ajanga Avenfield ken o nung Nawaz-i nem temeden agüja liasü. Iba sülen ano December 12 nü PML-N tetsüti ya Al-Azizia ken o nunga temeden agüja liasü.

Shehbaz-isa Nawaz aser party-i pa nem ato kilonser menden nung amentsü nungloktsü ta ashi.

"Itemji bilemdanga aser aseni meima aliba leniri teti len ania aruba ajanga Mohammad Nawaz Sharif-i PML-N tir mapa inyaksü mapang tongogo ta amanger," ta Shehbaz-i ashi.

"Asen party tangatetba aser pei mapa angateta tir menden nungi ni alur," ta pai ashi.

Nawaz lenisüba kübok pai tashi angaa party tenzüksü, ta paisa ashi.

# Russia: Putin-i Defence Minister Sergei Shoigu melener



**Moscow, Monupii/May 13 (Agencies):** Ukraine nung rara tenzükur kum ana dak tema arudang Deobarnü Russia Tir Vladimir Putin-i defence minister Sergei Shoigu melentsü benoka liasü.

Shoigu melen Deputy Prime Minister Andrey Belousov shimtsü Putin-i tenüing agütsü, ta Russia indang upper house of parliament, Federation Council ajanga ministerial nominations adoktsüba nung shia liasü.

Ukraine anüdoklen Russian sepaitemi takok ngua aoba aser tang ang northeastern Kharkiv region nung ground operations tenzüllen iba temelenshi ya arur.

Ukraine yimtiba, Kyiv memaktetba aser Kharkiv aser southern Kherson region tem nungi sepaitem meyipa aruba densema Ukraine nung rara tenzükur mezüing kum mitkar tsütsü tamakok jenti ajuruaka Putin ya tesü tashi Shoigu den nokdaka liasü.

Taoba kum Shoigu anenjang ta takhangba agüja Wagner paramilitary chief Yevgeny Prigozhin-i sorkar anema azüdokshia nokdaka liasü.

Defence ministry nung shisatsü tasen nüngdaker, ta Deobarnü Kremlin ajanga ashi. "Defence ministry ya shisatsü tasen atema tangatetba

teladak nüngdaker, shisatsü tasen aser tajungba amshitsü aser rongsenketzüing tsütsü dangar den tokteptetsüla," ta Kremlin odongtar Dmitry Peskov-i ashi.

"Shisatsü tasen asoshi shiri mulunga alir, pari tongpang nung takok angur. Iba yongji tiri Andrey Belousov shimtsü mulungtet südi," ta pai ashi.

Belousov ya military background meliaka kum aika Putin indang economic adviser tem rongnung tejangja nübu ka ama lia arur.

Shoigu lenisüba kübok Ukraine rara nung Russian sepa 355,000 dak tema takum samaogo aser civilian kanga timtemer, ta UK defence minister Grant Shapps-i ashi.

Russia-i iba ama takoksa tulu ajuruba anentsü aser rara tembangtsü Defence Minister ka nüngdaker, saka parnoki ano Putin indang 'puppets' ang angutsü, ta pai X (Twitter) nung zülutsü.

Arishi kum 68 tain Shoigu ya military background meliaka Russia indang defence minister ka ama 2012 kum shim aser post-Soviet Russia nunga kum aika pa yimtenren tsütsü tetsüing ajemoker lia aru.

Shoigu ya civil engineer ka lir aser 1990s mapang emergencies and disaster relief ministry nung tekolakba ama inyakdang nüngtugu akum.

Putin marudang yongi Moscow nung Shoigu ya jenjang alangteter liasü.

February 2022 nung mitkar tashi ajak amshia Ukraine mamakdang Shoigu ya Putin indang tamang katetba lieutenants rongnung ka liasü.

Tena ya mapang shia

Siberian arem min nung shikaria aser ango pua südoksünema senzüba noksa tem nung ngua liasü.

Kremlin ajanga 2017 kum noksa ka lemsatepba nung tena ya tula masem awatsüing ka anasa anü wanga mena liasü.

Deobarnüsa Putin-i ozüing kar sangdongba nung Shoigu ya Nikolai Patrushev melena Security Council indang secretary tasenba asütsü shia liasü.

Chief of the General Staff, Valery Gerasimov ya kasa mapa inyaka Ukraine nung anogoshi military operations achayangtsü, ta Kremlin ajangasa ashi.

Moscow mitkar tamakok ajuruba atema Prigozhin'er teloki Shoigu den Gerasimov daka tenük yoka liasü.

Tena mapa nungi anenjang ta takhangba agüja Moscow-i aosang Prigozhin ya hopta ishika lir tayimtsü ka tsükokba nung asü.

March ita election nung takok anguba sülen government minister tem tasen shimtsü mesüra tang alirtem shimshitsü atema Putin dak tashi lir.

Russia indang rubber-stamp parliament nung ozüing yanglurtemi tir indang nominations agizüksü nüngdaker, aser parnoki anogo ishika tsüingta parnoki ibaji inyaksü.

Mapang ka Putin melentsü ta repranga alisang Patrushev tarutsü tia kechi nung aliar mejangjai kumogo.

Tawa agiba election nung vote shilem 87 agi takok anguba sülen Putin ya ponguben buba tir inyaksü Mongulbarnü tenangzüktep agia liasü.

## CWA ketdangpurtem menden melentepogo



Mapa toktsüba aser ketdangsür tasentem tangokba noksa nung angur.

**Kohima, Monupii/May 13**

**(TYO):** Chakhesang Wrestling Association (CWA) ketdangpurtem melentepba sentong Hombarnü Nagaland Olympic Association Office, Officers Hill, Kohima nung agiogo.

Mapang toktsüba General Secretary, Kuzhovesa Soho aser tir Vekhozo Ringa nati mapa toktsüba ketdangsürtem tenüng nung sangdong ka ajanga, küm pezü tashi mapa bener aruba mapang parnok nongita yariba atema kanga pelaba lemsatap aser iba ajanga parnok tenure takok nung tembangtetogo, ta ashi.

Kasa mapang nung tir tasenba Vezohu Ruho-i, Chakhesang nungertemi pa aser par team dak tamang kateta 2024 nungi 2028 tashi tenzüksü atema shimba asoshi kanga pelaba lemsatapa liasü. Nüburtem ajak dang teka amteper inyaksü mepeshiba den wrestling asaya terenlok asoshi ajak longjemer Association sentong aser inyakyimtem tejakdangi bener aotsü ayongzüka liasü.

**2024 nungi 2028 küm tashi CWA tenzüksü shimertem:**

- \* President : Vezohu Ruho
- \* Vice President: Zazhota Dawhuo

- \* Gen. Secy: Kukhoto Venyo
- \* Joint Secretaries: Vekhozo Vero and Wenyilo Lohe
- \* Finance Secretary: Thupuruda Nienu
- \* Treasurer: Er. Shekhotso Keyho
- \* Technical Secy: Rudasa Curhah
- \* Asst. Tech. Secy: Pozoto Shijoh
- \* Press Secretary: Vizo Lea
- \* Property Secretary: Thuvoshuyi Lohe
- \* Women Coordinator: Honi Medeo
- \* CWA Rept to NWA: Kuhusheyi D. Vadeo and Mudongoyi Swuro
- \* Advisors: Chisazo Dawhuo, Hukhoneyi Soho and Lhuvunu Phesao.

**Rankireddy aser Chirag na Thailand Open nung asayatsü****Monupii/May 13, 2024**

**(Agencies):** India nunger nungtugu badminton tarep asayar Satwiksairaj Rankireddy aser Chirag Shetty na Mongolbarnü nungi tenzüka Thailand Open Super 500 asayamung nung shilem agitsü.

Tena ya Paris Olympics nung gold medal angutsü imlaba tarep rongnung ka lir aser tawa Thomas Cup asayaba mapang Indonesia aser China nunger tarep den asayadang serves balala junga magizükteti liasü.

Tena dang iba ken o ya bentettsü atema rangloker inyakdar aser Thailand Open nung tena mezüngbuba Malaysia nunger tarep Nur Mohd Azriyn Ayub Azriyn aser Tan Wee Kiong na den asayatsü.

Tebur kija asaya nung India nunger asayartem rongnung temaba jenjang nung alisang HS Prannoy-a iba asayamung nung shilem agiba angutsü. Pa taküm junga masayateti arudar. Pa asayaba yimya dak temulung lemteta akümtsüsa Indonesia nunger asayar Anthony Ginting kokaka China nunger asayar Shi Yuqi tera agi makokba ajanga tongtibang asayatem nung nungdaka aliba

mapang junga asayatettsü atema renemshitsü nungdakba ngutetogo.

Kiran George aser Sathish Kumar Karunakaran nata iba asayamung shilem agitsü. Kiran mezüngbuba asaya China nunger Australia Open winner Weng Hong Yang den asayatsü aser Sathish mezüngbuba asaya qualifier ka den asayatsü.

PV Sindhu masayaba mapang tetsürtem rongnungi Ashmita Chaliha, Malvika Bansod, aser Aakarshi Kashyap nunger tetsür kija asaya nung shilem agitsü. Ashmita mezüngbuba asaya Indonesia tsür Ester Nurumi Tri Wardoyo den asayatsü, Malvika China tsür Han Yue den aser Aakarshi Thailand tsür Busanan Ongbamrunphan den asayatsü.

Lanur asayar Unnati Hooda aser Imad Farooqui Samiya nata mezüngbuba round nung Bengium nunger asayar Lianne Tan aser China nunger Goa Fang Jie den asayatsü. Tetsür tarep asaya nung Tanisha Crasto aser Ashwini Ponnappa na mezüngbuba round bye nguogo. Tena Paris Olympics atema qualify süogo.

**Olympics atema wrestling trials June 10 nü agitsü****Monupii/May 13, 2024**

**(Agencies):** Taküm Parsi Olympics nung India nunger tebur freestyle wrestler kati dang shilem agitsü aser kasa mapang nung tetsür pongui shilem agiba angutsü.

Honibarnü Aman Sehrawat (57kg) qualify asüba sülen Istanbul nung World Olympic Qualifier nung India nunger tebur asayartemi ano quota karbosa angutsü imla liasü, saka Sujeet Kalkal (65kg) aser Jaideep Ahlawat (74kg) naprongla repechage round nung tsükatok.

Tokyo Olympics nung India nunger wrestler temi kanga junga asaya-a Ravi Dahiya (57kg) aser Bajrang Punia (65kg) nati silver aser bronze medal ngua liasü. Ajisüaka India nung wrestling asaya achaayangba lokti tentet tir anema asayartemi küm ka shi longkak aitba ajanga asaya dak kongshiogo. Iba mapang national camp kecha magi aser iba ajanga Olympics asayatsüba küm training dak kongshiogo.

Sujeet qualify mesütetba

**Chopra & Kishore na indang indanga Fed Cup Finals asayatsü****Monupii/May 13, 2024**

**(Agencies):** India nunger nungtugu javelin throw asayar Neeraj Chopra aser Kishore Jena na May 15 nü Bhubaneswar nung asayatsü aliba Federation Cup finals-i indang indanga iogo, kechiyong tenati minimum qualification mark (75m) aiben ajangteter lir.

Olympic aser world champion Chopra-i taoba hopta Doha Diamond League nung kanga junga asaya pai nület meter 88.38 atsü, aser tanabuba jenjang nung tembanga liasü. Asian Games nung silver medal ngur alisang Jena-a taküm mezüngbuba Doha nung Diamond League nung asaya ajisüaka pai nület meter 76.31 dang tsüteta round asem dang asayar tsüka liasü.

DP Manu, shiba 2023 World Championships nung trokbuba nung tembanga aser Paris Olympics atema qualify asütsü merangdar, pa-a final nung indang indanga asayatsü.

"Asayartem shirnokisa 75m mark ajangtetogo parnok Mongolbarnü qualifying round masayatsü. Neeraj aser Jena na densema asayamung atema tenüng züngoksemer alirtem rongnung parnok teku

den Parnok Bodhbarnü final nung indang indanga shilem agitsü," ta Indian athletics head coach Radhakrishnan Nair-i ashi.

"Asayar tanungba shirnoki 75m mark majangteti lir parnok qualifying round nung tokteptsü aser temaba jenjang nung tembanga asayar asem tanungba asayar teku den final asayatsü," ta paisa shisem.

Arishi küm 26 tain Chopra küm asem sülen tang mezüngbuba kidang tokteptsü lir aser iba atema AFI kanga yongya atadar.

"Neeraj-i Federation Cup nung shilem agiba atema AFI mesüngmanger. Pai domestic asayamung nung shilem agiba ya India nunger asyartem atema kanga tajung lir," ta AFI ketdangsür kati PTI dang ashi.

Osang ajanga ashiba agi, Chopra-i Tokyo Olympics nung gold medal anguba sülen aser Paris Olympics masaya tsüngda AFI-i pa kidang toktepdaktsünüa liasü.

Pa 2022 aser 2023 küm domestic asayamungtem nung shilem magi, kechiyong pa bendanglen asayamung balala nung toktepba den training agia liasü. Pa kidang tatemsa 2021 küm March ita Federation Cup nung toktepa liasü.

den Punia-a lenmang shibangogo. Ajisüaka Dahiya (65kg) bo asayatsü maongka ngutetogo. Wrestling Federation of India (WFI) tir Sanjay Singh-i Deobarnü sangdong ka ajanga Olympics atema squad shimtsü asoshi taruba ita tetenzüklen trails agitsü ta metetdaksüogo.

"Selection trials June 10 nü agitsü. Wrestler tem kar bendanglen training agidar aser parnok meyipa aruba sülen trails agitsü. Onok indang policy nung agüja aliba format dak ajemdaker trail agitsü, kong temsüa aliba wrestler pezü rongnungi challenger ka shimtsü aser quota ngur aliba asayar den bout asem asayatsü. Quota ngur alirtemi khen akoktsü nungdaker aser pa/lai challenger mekokra pa/la nem maongka ana agütsütsü," ta pai ashi.

Tetsür asayartem rongnungi Vinesh Phogat (50kg), Antim Panghal (53kg), Anshu Malik (57kg), Nisha Dahiya (68kg) aser Reetika Hooda (75kg) nungeri quota nguteter lir. Patiala nung trail agiba mapang 53kg asaya nung Vinesh top four nung tembanga aser 50kg asaya koka liasü. Lai ashiba agi la 53kg class nungang tasayanüba. Bishkek nung Asian Qualifiers asayaba mapang Vinesh-i 50kg nung quota nguteta liasü. La 50kg nung dang asayatsü asü 53 atema Antim den tokteptsü aji mejangjai lir.

Iba dak sendakba nung WFI tir Singh-i ashiba agi, lai weight category ka shimtsüla. "Onok UWW (world body) rule sülen anidaktsü, kong wrestler ka weight category ka nung dang asayatsü ta shia lir. Lai 50kg mesüra 53kg shimtsüsa akümtsü. Lai koba weight shimdir idakji la tokteptsü," ta Singh-i ashi.

**BILEMDANGANG**

**"Nisung ka kümzükbaji alima ajunga kümzükbaba den saku".**